



LE GOUVERNEMENT
DU GRAND-DUCHÉ DE LUXEMBOURG
Ministère de la Fonction publique

Réf. : mfp_838x0f25b

Dossier suivi par :
FRANCK Nathalie
Tél. : 247-83097

Monsieur le Ministre aux Relations avec le
Parlement
Service central de législation

Luxembourg, le 30 AVR. 2021

Objet : Réponse commune du Ministre de la Fonction Publique et du Ministre de l'Aménagement du territoire à la question parlementaire n° 4003 du 01.04.2021 de Monsieur le Député André Bauler concernant l'installation d'administrations publiques dans la Nordstad

Monsieur le Ministre,

Par la présente, j'ai l'honneur de vous transmettre ci-joint la réponse commune à la question parlementaire n°4003 relative à l'objet sous rubrique.

Veuillez agréer, Monsieur le Ministre, l'expression de ma considération distinguée.

Le Ministre de la Fonction publique



Marc Hansen

Äntwert vum Här Minister fir d'Fonction publique, Marc Hansen, a vum Här Minister fir Landesplanung, Claude Turmes, op d'parlamentaresch Fro n°4003 vum 1. Abrëll 2021 vum honorabelen Deputéierte André Bauler iwwert d' Schafe vun administrative Strukturen an der Nordstad

Déi Ausso vum Minister fir Landesplanung am Interview vum 27. Februar 2021 kuerz no der Virstellung vun de 4 sektorielle Pläng déi den 1. Mäerz a Kraaft getruede sinn, entsprécht dem generellen Haaptzil vun der Landesplanungspolitik: am allgemengen Interessi, der gesamter Lëtzebuerger Bevëlkerung optimal Liewensbedingungen an dem gesamte Lëtzebuerger Territoire eng nohalteg Entwécklung ze garantéieren andeems ons Ëmwelt an natierlech Ressourcen, virop de Buedem, geschount ginn.

Fir dëst Zil ze erreechen ass et noutwenneg souwuel déi administrativ Dezentralisatioun, oder technesch gesot d'Dekonzentratioun, vun der Stad Lëtzebuerg am Land esou ze organiséieren, fir eng beschtméiglechst ausgeglachen territorial Entwécklung zu Lëtzebuerg ze fërderen. An deem Sënn ass et wichteg, datt déi zwou Agglomeratiounen, d'Nordstad an d'Südregioun, respektiv Esch-Uelzecht, weider entwéckelt gi fir eng besser Verdeelung vun den Aktivitéiten am Land ze favoriséieren an esou ee beschtméiglechen Accès vun de Verwaltungen fir d'Bierger ze garantéieren.

Den interministeriellen Aarbechtsgrupp fir de neien zukünftege Programme directeur d'aménagement du territoire (PDAT) befaasst sech natierlech mat dësen Thematiken an och anere wéi z.B. d'Definitioun vun enger Armature urbaine, d'Entwécklung vum ländleche Raum, d'Ëmsetzung vun de Prinzipie vun der Stad vun de kuerze Weeër, etc. Aner Sujete wéi de Co-working oder och den Télétravail ginn ugeschwat: zwee Sujeten déi u Relevanz gewonnen hunn wéinst der Covid-Kris.

D'Aarbechte fir e landesplanerescht Leitbild „Visioun Nordstad 2035“ sinn amgaang a wäerten an den nächste Méint ofgeschloss ginn. D'Nordstad soll zum 3. Entwécklungspool ginn an als „Dier zum Norden“ fungéieren. D'Meenung vum Bierger ass e puer Mol gefrot ginn a gëtt och berécksichtegt fir eng nohalteg an innovativ Duerf – a Stadentwécklung ze garantéieren.

Den interministeriellen Aarbechtsgrupp „Limitation des besoins en mobilité“, am Kader vum Rifkin Prozess, huet och der Regierung e Rapport virgeluecht an deem explizit erwänt gëtt, datt de Co-working an d'CDA'en (centre de développement et d'attraction), dorënner virun allem d'Nordstad an Esch-Uelzecht, solle gefërdert ginn.

Verschiede Projeten hunn déi lescht Joren a wäerten och deemnächst déi territorial strategesch Stellung vun der Nordstad verstärkt respektiv verstärken: z.B. Neibau vum Lycée agricole a vum Nordstadlycée, Lycée pour professions de santé zu Ettelbréck, Erweiterung vum Centre hospitalier du Nord, Ausbau vun der Ettelbrécker Gare mat enger Jugendherberg an engem Verwaltungsgebai, Erneuerung vun der N7 tëscht Dikrech an Ettelbréck an e neit Mobilitéitskonzept fir de Norden, etc.

De Staat lount och zousätzlech administrativ Surfacen an der Nordstad. Des zousätzlech Büroen zu Ettelbréck déi 2023 geliwwert ginn erlaben et dem Staat seng Verwaltungen a Servicer um Territoire vun der Nordstad ze verstärken.

Dernieft gëtt am Kader vum Réaménagement vun der Cité Militaire zu Dikrech nieft dem Bau vu Logementen och nach à moyen terme administrativ Gebaier vum Staat nei gebaut. Dëse Bau erlaabt dem Staat seng Verwaltungen och op dëser Plaz an neien, modernen a funktionellen Infrastrukturen ënnerzebréngen.

All déi Iwwerleeungen an Diskussiounen déi bis ewell gefouert gi striewen also d'Verstärkung vun der Nordstad a vu senge Gemengen an awer och insgesamt vum Norde vum Land un. Diskussiounen gi weider, d'Aarbechten sinn nach net ofgeschloss a ginn déi nächst Méint op interministeriellem Niveau weider verdéift fir bis Enn 2021 aus landesplanerescher Siicht konkret Mesuren op den Dësch ze leeën : am Kader vun der Dezentraliséierung a vun der Dekonzentratioun.

De Ministère fir d'Fonction publique, de Finanzministère an den Departement fir Landesplanung féieren och weider Analyse fir ze definéieren wou a wéi eng Verwaltungen weiderhin an der Nordstad kënnen ugesidelt ginn. Punktuell wäerten och Étuden entaméiert ginn, zesumme mat Nordgemengen, fir ze präiwen, ob et Méiglechkeeten vu Co-working Espacen am ländlechen Raum ginn.